

ТАНИЛЦУУЛГА

"Иргэний ба арилжааны хэргийн талаар эрх зүйн болон шүүхийн харилцан туслалцаа үзүүлэх тухай Монгол Улс болон Бүгд Найрамдах Хятад Ард Улсын Засаг захиргааны онцгой бүс Макао хоорондын хэлэлцээр"-ийн төсөл

Улс орнууд эрх зүйн харилцан туслалцаа үзүүлэх тухай гэрээний үндсэн дээр иргэний хэрэг хянан шийдвэрлэхтэй холбоотой зарим ажиллагааг гадаад улсын нутаг дэвсгэрт гүйцэтгүүлэх боломжтой болдог.

Монгол Улс одоогийн байдлаар эрх зүйн харилцан туслалцаа үзүүлэх чиглэлээр нийт 23 улстай 36 хоёр талт олон улсын гэрээ байгуулсан бөгөөд үүний 16 нь иргэний хэрэгт эрх зүйн харилцан туслалцаа үзүүлэх гэрээ байна.

Монгол Улс, Бүгд Найрамдах Хятад Ард Улс хооронд байгуулсан иргэн, эрүүгийн хэрэгт эрх зүйн харилцан туслалцаа үзүүлэх тухай гэрээ, гэмт этгээд шилжүүлэх тухай гэрээ, ялтан шилжүүлэх тухай гэрээ нь Бүгд Найрамдах Хятад Ард Улсын Засаг захиргааны онцгой бүс Макаод үйлчлэхгүй юм.

Иймд Монгол Улсын иргэд Макаод суралцах, ажиллах, бизнес болон аяллын зорилгоор зорчих, оршин суух зэрэг шилжилт хөдөлгөөн ихээр нэмэгдэх болсонтой холбогдуулан 2017 онд "Ялтан шилжүүлэх тухай Монгол Улс, Бүгд Найрамдах Хятад Ард Улсын Засаг захиргааны онцгой бүс Макао хоорондын хэлэлцээр", 2019 онд "Эрүүгийн хэргийн талаар эрх зүйн туслалцаа харилцан үзүүлэх тухай Монгол Улс, Бүгд Найрамдах Хятад Ард Улсын Засаг захиргааны онцгой бүс Макао хоорондын хэлэлцээр"-ийг тус тус байгуулсан.

Харин "Иргэний ба арилжааны хэргийн талаар эрх зүйн болон шүүхийн харилцан туслалцаа үзүүлэх тухай Монгол Улс, Бүгд Найрамдах Хятад Ард Улсын Засаг захиргааны онцгой бүс Макао хоорондын хэлэлцээр"-ийн төслийг Макаогийн талтай 2019 онд тохирч үзэглэсэн бөгөөд Макаогийн тал цар тахлын нөхцөл байдлыг харгалзан хэлэлцээрт ажлын журмаар гарын үсэг зурж, дипломат шугамаар солилцон байгуулах санал ирүүлсэн.

Энэхүү хэлэлцээрийн төсөл нь 19 зүйлтэй бөгөөд эрх зүйн туслалцаа үзүүлэх хүрээ, иргэн, хуулийн этгээдийн эрх зүйн хамгаалалт, туслалцаа үзүүлэх журам, гэрч, шинжээчид холбогдох зохицуулалт, туслалцаа үзүүлэхээс татгалзах үндэслэлийн талаар тусгасан болно.

Олон улсын гэрээний тухай хуулийн 8 дугаар зүйлийн 8.1.4-т заасны дагуу уг хэлэлцээр нь заавал соёрхон батлах олон улсын гэрээ байх тул хэлэлцээр байгуулах асуудлыг Засгийн газрын хуралдаанаар хэлэлцүүлж, Улсын Их Хурлын холбогдох Байнгын хороотой урьдчилан зөвшилцөнө.

ХУУЛЬ ЗҮЙ, ДОТООД ХЭРГИЙН ЯАМ